

Visoki predstavnik smjenio načelnika općine Donji Vakuf

Visoki predstavnik, Paddy Ashdown, je u ponedjeljak donio Odluku kojom se Kemal Terzić smjenjuje sa položaja načelnika općine Donji Vakuf. Odluka, koja stupa sa snagom odmah, zabranjuje gospodinu Terziću obavljanje svake službene, izabrane ili imenovane javne funkcije, te kandidiranje na izborima ili za funkciju unutar političkih stranaka.

Visoki predstavnik je donio ovu Odluku zbog toga što je gospodin Terzić uporno djelovao u pravcu sprečavanja povratka izbjeglica u svoje domove u općini Donji Vakuf.

“Ova Odluka je prije svega opomena svima onima koji stoje na putu povratka izbjeglica svojim domovima da se ovakvo ponašanje neće tolerirati,” kazao je visoki predstavnik. “Pravo izbjeglica i raseljenih lica na povratak u svoje domove je od ključnog značaja za sve ono što činimo u ovoj zemlji.”

Visoki predstavnik je kazao da će Odluka pomoći Muslimanima Srebrenice da se vrate u svoje domove, isto kao što će omogućiti Srbima, koji su privremeno smješteni u Srebrenici, Bratuncu i Gradišci, da se vrate u svoje domove u Donjem Vakufu, što nisu mogli da urade zbog opstrukcija koje je vršila administracija gospodina Terzića.

“Kemal Terzić tvrdi da je branio interese lokalnog bošnjačkog stanovništva,” kazao je visoki predstavnik, “ustvari, on je nanio štetu interesima najugroženijim među Bošnjacima, uključujući one koji su najviše izgubili u ratu.”

Visoki predstavnik je kazao da je gospodin Terzić davao smišljene izjave u cilju zastrašivanja pripadnika manjina, da je destimulirao dodjelu općinskih i kantonalnih sredstava za obnovu povratničkih kuća, da je štitiio višestruke korisnike od deložacije, te da se protivio dodjeli općinskih sredstava za

alternativni smještaj za raseljena lica. Visoki predstavnik je dodao da je gospodin Terzić lično otkupio i uselio se u stan za koji je podnijet zahtjev, što je "potpuno neodgovorno djelo nekoga na takvom položaju."

"Ova smjena predstavlja upozorenje svakom načelniku općine ili dužnosniku na javnom položaju koji stoji na putu procesa povratka," zaključio je visoki predstavnik.